

L E G R O L O .

Pêrchenâdzo : Philémon, viye dzouno, 55 an.
Jéni, cha chêrvinta, 42-45 an.

Ha pitita komédiya chè pâchè din na méjon d'la Grevire, ou pêyo, on dèvēlené dè terâdzo dè la Lotèri remanda. Pêyo arandji a la mouda d'intche-no. L'è intrè 9 ârè è 10-j-ârè dou dèvēlené.

Scène 1. Jéni, cholèta, in trikotin on gran pyêlè bleu.

Jéni. Binchure ke n'in fudri on nâ ! Ma alâdè ! Avu m on patron ache avuitin tyè Philémon ! Li a vint'an ke chu chêrvinta din la méjon è n'é djêmé yu tyè chi potajé. Irè dza viyo kan chu arouvâye du tin d'la dona a Philémon. On'avuitinta, achebin, la viye Fine ! Jorche ! L'a fi cha popote ou kemâhyo, chu le foyidzo, tantyè ke l'a anfin èretâ chi chèlébro potajé, dè cha tanta Fanchête. Tyinta mônètyâ ! Vo dyo ke fâmè kemin na tzêrbounêre. On li tin pâ mé din chi l'othô, kan fâ la bije kemin ouê. On li fâmèri tot'on kayon, vo dyo. (in prenyin le papê ke l'è chu la trâbya) Tê ! L'è chta né ke tiron la lotèri remanda. Poru ke Philémon li moujichè pâ ! Ma, moujâdè ! M'a bayi na pithe por adzetâ on biyè dè lotèri po chin ke li a vint'an ke chu a mètre che. Mè ke n'é djêmé-j-e-j-ou na breka dè tzanthe po hou-j-ichtoirè... Ache, mè chu to chinpyamin dèpatcha dè mè prokurâ on pâ dè bonbochè avu chta pithe. Chu oumintè chure dè pâ pèdre men-êrdzin, pâ veré ? Binchure ke li é rin de, a li ! (in vouitin ou rêlodzo) Dyi-j-âre ! Chon in trin dè teri la lotèri... (on'intin alâ innan le pouêrtzo) Aie ! Teché le patron ! L'è dza ~~mèmpm~~ rèpri du la mija... Poru ke li moujichè pâ a chi biyè !

Scène 2. Jéni è Philémon.

Jéni. (a Phil. k'intrè) Adon, la mija l'a bin teri ?
Phil. Jorche ! Tyin pri dè fou ! Bayi di paryè chomè po di biyenè dè rin, di kuvè, tyè ! On deri pâ k'on'è in Grevire.
Jéni. E ke li a tan dè bou mouâ ke chè pourè din lè dzâ.
Phil. Tyè vou-tho ? Lè dzin âmon mi mijâ kemin di-j-inradji tyè dè lou bayi la pèna d'alâ fére di fago a la dzâ, ke lou kothèran rin, portan...
Jéni. Tyè la pèna.
Phil. L'è bin chin ! (on momin) A propou, â-tho adzetâ ton biyè po la lotèri ?
Jéni. (a pâ) Teché ! (a Phil.) Fédè-vo pâ dou pochyin : to l'è in'ouâdre.
Phil. A la boun'âra !
Jéni. L'è vo, Philémon, ke vo-j-arâ bin du n'in prindre on, dè biyè. Vo-j-arâ èpê gânyî dè tyè adzetâ on'ôtro potajé...
Phil. (indinyi) On'ôtre potajé ???!!! Te katenè, outyè ? Mè chèpâro pâ dè no-thron potajé. On chovinyi dè ma poura dona, ke le Bon Dyû betichè in bon rèpou !
Jéni. (in'apondin) ...è chon potajé avouê !
Phil. Va èchtra bin, chi potajé. Ma tanta Fanchête, Dyû la pèrdenê...
Jéni. (in li kopin le chubyè) ...dè vo-j-avi tèchtâ ha mâre dè potajé...
Phil. (chin oure) Ma tanta Fanchête l'avi adzetâ d'okajyon l'an d'l'èchpoji-chyon.
Jéni. In 1900 ??? Jorche Maryâ !!!
Phil. Ma vouê. Chin fâ ke l'a a pèna thinkant'an. L'è pou por on potajé in fonta. Chè ke chin l'è d'la martchandi dè dèvan la dyêra. Dou bon !
Jéni. Dou bon po la fêraye... vouê... è po foumâ lè brâvè dzin è lè tzanbètè. Alâdè rintyè vouti a l'othô : on li tàyèri la foumêre avu on kuti !

- Phil. Te mè fâ di grô lâ, Jéni. Chin chin, kan lè fèmalè l'an fan dè lou dè-
fére d'ôtyè... li trâvon ti lè dèfô. Vêyo prou yô la tzata l'a mô ou pi :
vudri on potajé èlèktrike, pèrdyi ! Binchure ! "La femme moderne cuit à
l'électricité", ti lè papé le dyon. E lè fèmalè avâlon to chin. Te vèri,
n'in rèvindron dza dè totè hou maniganthè. Duche a kotyè-j-an, nyon n'in
vudrè rin mé dè hou mônètyâ dè machiné a l'èlèktrichitâ : d'la bourtyâ,
d'la matêre dè-j-èlyudzo, on châ pâ tyè. On vertâbyo flèô po le payi. 2
- Jéni. Ma !
- Phil. (in kontinuin) L'è la rina di martchan dè bou, la rina di martchan dè
motzètè, la rina di potyé ke tâmon lè pilè, chin kontâ ha di ramouneu.
Epu, adyu la bala hyanma ke lètze le po dè metô panthu ! Adyu le bi fu
k'èhyètè chu le foyidzo...
- Jéni. (in'apondin) ...è ke fâmè...
- Phil. Te pyèdêyè po le potajé èlèktrike, t'â fan d'ithre a la mouda. Le vèyo
prâ, na. Na, na, Jéni, châbrèri fidélo ou chovinyi dè ma dona.
- Jéni. (in'apondin) ...è a chon wiye potajé.
- Phil. E le vouèrdèri, chon potajé, du tin ke vèkethri.
- Jéni. Vo farâ mi dè dre du tin ke vèkethrè. I tzê pè davouè. Vo kouâjo dè vi-
vre pye grantin tyè li. Pè bouneu ke vo-j-ithè mi mantinyè !
- Phil. L'è portan dyi-j-an dè pye.
- Jéni. Vouè, ma vo fougâdè pâ, vo. Li n'in pou pâ dre atan. Tyint'invinhyon !
Che li ôchè pâ dza vint'an ke chu che, li châbrèré pâ on dzoua dèpye !
Chî potajé mè farè a muri.
- Phil. Tyè nenè, Jéni ! Te vè tot'in nè. Mè i krêyo chavè ke chi potajé tè pro-
londzèrè la ya è a mè achebin. No-j-in rèpârmè di débouâre è di mijérè !
Vouèste hou potajé èlèktrike : djémé tyè ôtyè a bougrachi dèveron, rinmé
dè kouran, lè pyon bourlâ, di cour-circuit, chin kontâ to le richto...
Mè, i chu chure ke le potajé a ma poura dona cherè pe bala korna in paradi.
- Jéni. Ebin, tinke-mè avu na bala kouèthe ! Jorche !... (on momin) Apri to, a-
tan chin tyè dè chupyâ din l'ôtro mondo avû lè-j-avâro.
- Phil. Oh ! Jéni ! Vudré-tho èpè bayi d'achintre ke chu on'avâro ? L'è mè dèfô,
kemin tzakon, d'akouâ, ma pâ chi. La prâva, l'è ke t'è onko payi on biyè
dè lotèri l'ôtri...
- Jéni. Vo le règrètâdè, outyè ?
- Phil. Prou chure tyè na ! Bin le kontréro ! Mè fâ gayâ pyéji dè t'avi mothrà ke-
min chu kontin dè tè bon chêrvucho... T'â pâ prè on nombre pair oumintè ?
- Jéni. Portyè pâ ?
- Phil. I volon dre ke gânyon pâ ache chyâ. T'â on nimerô pair outyè ?
- Jéni. Tyè n'in ché-yo ? L'è pâ a ma fata.
- Phil. Maleureuje ! Ch'alichan le tè robâ ?
- Jéni. Hô ! N'in cheran bin inpatchi.
- Phil. Ha ! Ha ! kachèrouda, te l'â gayâ bin katchi... è t'â aprè le nimerô pèr
kâ... Adon, te le mè vou pâ dre ? L'è on chèkrè ?
- Jéni. Ma na, l'è rin on chèkrè.
- Phil. Adon, l'è le ???
- Jéni. (in moujin) 31..... 1..... 41.....
- Phil. Le 31 - 141, te di ???
- Jéni. Bin che vo volè.
- Phil. Kemin chin : Bin che vo volè ? T'i pâ chure ?
- Jéni. Ma tyè chichyè, chu totafé chure di chire.

Phil. A la boun'âra ! Ebin, Tinke tèt poutithre dyora retze. Koué châ ? (in ³ vouitin le papê) Ma di-vê, l'è chta né ke la tiron ha lotèri, bayon le terâdzo a la radio. Raoudzê ! Li a dza on bon momin ke l'an keminhyi. In-prin-vê. Vire le boton... rido... rido ! (Jéni li va to pyan) Ma pye rido tyè chin, dèpatze-tè on bokon !

Jéni. Pfe !... Po chin ke l'é a atindre...

Phil. Tyè k'on'in châ ? (la radio keminthè) Ah ! Akuta... (on'intin la mujika) Na ! L'è d'la mujika. T'à portan bin betâ chu Sottens ?

Jéni. (Pâ tru chure) Krêyo... Ma vouê... (la mujika ch'arithè)

Phil. Ah ! Toparê ! Irè achurâ on mochi intrè dou terâdzo... (on'intin la vouê dou speaker : Et maintenant, chers auditeurs, vous allez assister au tirage du gros lot de 50.000 francs) Ch'alâvè ithre por tè, Jéni !

Jéni. Kridè pire ! Pâ dè richka !

Phil. (le speaker dit : 3) Trè ! L'è bin le trint'yon 141, ton nimerô, tyé ???

Jéni. Vouê ! (Speaker : 1)

Phil. On ! Fâ trint'yon ! (Speaker : 1) (Phil. tot'inpontâ) Jéni !... (Speaker : 4) Jéni ! Mè vin mō !... (Jéni koua vēr li)(Speaker : 1) Ton nimerô !!! Jéni, tè dèmando in maryâdzo...

Jéni. (tot'èkafoudya) Ma toparê !!!

Phil. L'è dinche ! Li a pachâ vint'an ke tè konyecho... è ke t'âmo...

Jéni. Vo ?

Phil. Ouê, mè. Te le vou pâ krêre ? Ah ! i dèveno portyè. L'è achurâ a kôja dè ha mâre dè potajé ? Ebin, Jéni, ma tan galéja pitita Jéni, mon trèjouâ, ma miya, ma tan galéja miyèta... rinmé dè m ha mâre dè potajé po no chè-parâ. Le vindo, to bi dèman. No-j-adzetèrin on potajé èlèktrike. Ouê, on potajé èlèktrike, puchke te li tin. Va-the dinche ?

Jéni. Vouê, ma.....

Phil. Li a pâ dè "vouê mâ" ke li fachè. Tè pâyô on potajé èlèktrike ou maryâdzo. Va-the ?

Jéni. Ma fê, chu on bokon chin dèvan dèrê avu to chin... Li m'atindé pâ mé tyè a on kou dè tenêvro.

Phil. Kemin t'avé djêmé-j-ou moujâ ke tè poré rindre eureuje ?

Jéni. (jénâye) Dyo pâ chin, ma.... vudré pâ.....

Phil. Te mè vou pâ ??? T'âmè achurâ mi on dè hou dzouno chinyorè d'la vela ke tè riflèrè tè thinkanta mile fran è ke tè rindrè maleureuje kemin lè pèrè...

Jéni. Ma l'é djêmé moujâ dè mè maryâ, pâ mé avu on d'la vela tyè avu vo.

Phil. Adon, te mè vou pâ ?

Jéni. Dyo pâ chin ; i moujo. Mè dèmando che vo mè vudrà adi maryâ kan vo chari to.

Phil. (inpontâ) Ma tyè ??? Tyè ? Di-lo !

Jéni. Dabôre, chavé pâ ke l'êrdzin aterivè le tenêvro.....

Phil. (chin konprindre) Kemin, chin ?

Jéni. Ebin, dèvantye ke le nimerô 31.141 ôchè gânyi 50.000 fran, djêmé vo m'avâ parlâ dè mè maryâ...

Phil. A vouê ??? Adon, l'è-j-ou d'l'oubyiche. L'é tan dè trayin avu mè bithè, mè bèthètè ke n'é pâ pi le tin dè moujâ a mè ~~maryâ~~ mimo.

Jéni. Ma è ch'ôcho pâ gânyi lè thinkanta mile ?

Phil. Tyiche-tè, maryanténe !!!

Jéni. Che no-j-ôchan mô konprê ?

- Phil. L'è inpochebyo, no-j-an konprê ti dou parê. Adon ?
- Jéni. L'è tan vuto fê dè chè tronpâ. Fô atindre la lichte d'la Foye, Che no no chin tronpâ.....
- Phil. Ebin, tan pi ! Apri to moujâ è to rèflèchi, mimamin che t'ôchè rin gânyi, cheré kontin dè tè maryâ. Mè vou-tho, vouê ou na ?
- Jéni. Chin kondihyon d'êrdzin ???
- Phil. Chin kondihyon. L'é prou êrdzin por no dou. Adon, tyè n'in di-tho ?
- Jéni. A ha kondihyon, chu d'akouâ. Che mè mârýo, n'in mârýèri tyè on ke m'ami-chè por mè è pâ po mè kurtze.
- Phil. (in l'inbranchin) Jéni, ma tan galéja Jéni, kemin i t'âmo !!!
- Jéni. (in le léchin fére) Philémon ! Mon galé Philémon !
- Phil. Kan no mârýin-no ?
- Jéni. Mè fô onko vo dre ôtyè dèvan...
- Phil. Adon ?
- Jéni. Ebin... mon biyè...
- Phil. Te l'â pèrdu ?
- Jéni. (penôda) Mè cheri-j-ou bin inpochebyo dè le pèdre... N'in-d-avé rin...
- Phil. Ma, Jéni !
- Jéni. L'è dinche ! L'avé fôta d'on pâ dè banbochè, lè-j-é adzetâyè le 31 dè janvyé, è dou nimerô 41. Chin fâ 31...1...41... ou bin kemin vo, vo déjà 31.141. Inke to le michtéro. Ora, apri to chin, che vo voli pâ mè maryâ, vo-j-in-d-in vudri rin. L'é vèku viye fiye tankora : mè vou pâ inkothâ dè le chobrâ.
- Phil. Ebin, apri to, tan pi ! Tan pi po lè thinkanta mile fran ! Tè prinnyo ke-? min t'i. T'i na brâva fiye, na pèrla. Vô mi na fèna d'atake chin rin tyè na banye avu na bala chenaye : kan l'êrdzin l'è lêvi, châbrè rin mé tyè la banye.... Tè prinnyo chin êrdzin.
- Jéni. (avu on bokon dè règrè) ... è chin potajé èlèktrike ???
- Phil. Ma binchure tyè na ! Tè bayo in kadô dè nothè.... on potajé èlèktrike.
- Jéni. (in l'abbranchin) Mè ke n'in-d-avé tan invide ! Ah ! Philémon, mon tan galé Philémon ! Kemin no cherin eureu inthinbyo !
- Phil. No-j-arin tyè on kouâ... tyè on'ârma...
- Jéni. (in'apondin) Epu tyè on potajé...!

R E D Y O .

E.D. Dact.
25.11.1956
V/Rt.